

Kommunit missingersuusiortarnerat, aningaasanik tigorianaateqarnerat, naatsorsuutaat, kukkusersuioqarnerat kiisalu karseqarnerat naatsorsuuseriveqarnerallu pillugit Namminersorlutik Oqartussat nalunaarutaat nr. 3, 3. februar 2012-imeersoq Atuussimasoq (Historisk)

Kommunit aqunneqarnerat pillugu Inatsisartut inatsisaat nr. 22, 18. november 2010-meersumi § 41, imm. 5, § 42, imm. 3, § 47, imm. 3, aamma § 50, imm. 2 malillugit aalajangersarneqarpoq:

Missingersuusiortarneq

§ 1. Kommunit missingersuutaat ukiunut arlalinnut missingersuutitallit isertitanit akileraarutit pillugit Inatsisartut inatsisaanni kommuninut procentimik annertussusiliinissap aalajangiivigineqarnissaanut killiliussaq naatinnagu akuersissutigineqartassapput.

Imm. 2. Aningaasaqarnermut ataatsimiititaliami missingersuutininut siunnersuummi ikinnerussuteqartut oqaaseqaataanni § 2, imm. 1 aamma 4-mi piumasaqaatit naammassineqarsimassapput.

§ 2. Aningaasaqarnermut ataatsimiititaliap missingersuutininut siunnersuutaa kommunip isertitassaanut aningaasartuutissaanullu tamanut taamatuttaaq kommunip aningaasanik tigorianaataani aningaasaataasalu inissisimaffiini nikerarnermut tunngasuussaaq.

Imm. 2. Aningaasaqarnermut ataatsimiititaliap missingersuutininut siunnersuutaa missingersuusioriaatsimik missingersuutinillu immikkoortiterinerup annertussusianik toqqaanermut nassuiaammik ilaqartinneqassaaq.

Imm. 3. Missingersuutininut siunnersuut taamatuttaaq aningaasaliissutininut siunnersuutininut ataasiakkaanut nassuiaalluni oqaaseqaatinik ilaqartinneqassaaq taamaalilluni tunngaviummik aningaasaliinerni taaneqassalluni, qanoq ittunik piumasaqaateqarluni aningaasaliissutit atugassannortinneqassanersut, aningaasaliissutinilu allani, isertitassatut aningaasartuutissatut aningaasaliissutini killiffimmi aningaasaliissutini, suliassat aningaasaliivigineqartussat sukumiisumik allaaserineqassallutik.

Imm. 4. Missingersuutininut siunnersuut aningaasaliissutissanut siunnersuutininut tamanut minnerpaamik ukiunut pingasunut missingersuusiaagallartunik ilaqartinneqartassaaq, suliassaqaarfimmi pineqartumi kommunip allanngoriartortoqarnissaanik ilimagisai tassani taaneqarlutik. Missingersuutininut oqaasertaliussani ukiuni missingersuusiorfiugallartuni allanngoriartornissaaq allaaserineqassaaq.

§ 3. Kommunit aningaasat atoriaannaat nikerarnerinik missingersuusiorneri pissapput aningaasanut tigorianaannut missingersuusiatut isikkulerlugit, missingersuusianut tamarmiusunut ilanngullugit akuersissutigineqartartussatut.

Imm. 2. Aningaasanik tigorianaateqarnermut missingersuutini kommunip missingersuutini

anigaasaliissutinik tamanik ingerlaavartumik atuinera allassimassaaq, taamatutaaq killiffimmi anigaasaliissutit anigaasallu nikerarneri.

Imm. 3. Anigaasanik tigorianaateqarnermut missingersuutit nassuiaatinik allakkianik oqaaseqaatinilluunniit ilaqartinneqassapput. Missingersuutit aalajangersarnerini ukiumut aggersumut ukiumut missingersuusiorfiusumi anigaasat tigorianaat pillugit kommunalbestyrelsi sukumiinerusumik aalajangersaassaaq

Imm. 4. Kommunit sukkulluunniit anigaasanik tigorianaateqassapput ingerlaavartumik pisussaaffiit akilerneqartarnissaannut naammattumik. Missingersuutit aalajangersarnerini ukiumut aggersumut ukiumut missingersuusiorfiusumi anigaasat tigorianaat pillugit kommunalbestyrelsi sukumiinerusumik aalajangersaassaaq.

§ 4. Kommunip killiffimmi naatsorsuutiniittunik missingersuusiana anigaasat tigorianaat uningasuutit, pisassat akiitsullu sivikitsumik piffissalikkat, pisassat akiitsullu sivisuumik piffissalikkat kiisalu pigisat nalillit tunineqarsinnaangitsut akiitsullu kommunimi allanngoriartornerat taaneqassapput.

§ 5. Ilassutitut anigaasaliissutinut siunnersuummi allassimassapput ilassutitut anigaasaliissutit anigaasalersornissaannut siunnersuut aamma ilassutitut anigaasaliissutit anigaasatigut kingunerisassaat. § 2, imm. 3 aamma imm. 4, taamatutaaq ilassutinut anigaasaliissutini atorneqassapput.

Imm. 2. Aqutsinermut inatsimmi § 44, imm. 2 inatsisitigut tunngavigalugu missingersuutini nikerarnerit anigaasaqarnermut ataatsimiititaliamit suliarineqartut kommunalbestyrelsimut ilisimatitsissutigalugit saqqummiunneqassapput.

Imm. 3. Ilassutitut anigaasaliissutissanut siunnersuutit kommunalbestyrelsimut saqqummiunneqarnerminni anigaasaqarnermut ataatsimiititaliamit inassuteqaammik ilaqartinneqartassapput, ilassutitut anigaasaliissutit ataatsimiititaliap ataavartup suliaasaqarfianut tunngasuuppata taamatutaaq ataatsimiititaliamit pineqartumiit.

Aningaasaqarnermik aqutsineq

§ 6. Kommunilbestyrelsi kommunip anigaasaqarnermut aqutsineranut aalajangersakkanik aalajangersaassaaq.

Imm. 2. Missingersuutit akuersissutigineqarnerannut atatillugu kommunalbestyrelsip ukiumi tulliuuttumi anigaasaliissutinik nakkutilliinissamut piffissaliussat aalajangersassavai. Anigaasaliissutinik nakkutigineqartunut ilaassapput ingerlatsineq, sanaartukkat aamma anigaasaatini nikerarnerit anigaasanillu tigorianaatinut missingersuutit. Anigaasaliissutinik nakkutillineq ingerlaavartumik suliarineqartassaaq ikinneppaamillu ukiumut pingasoriarluni kommunalbestyrelsimut saqqummiunneqartassalluni.

Imm. 3. Anigaasaliissutinik nakkutilliinermi saqqummiunneqartut borgmesterip Nunamut Namminermut, Pinngortitamut Avatangiisimullu Naalakkersuisoqarfimmut nassiuttassavai.

Naatsorsuutit

§ 7. Kommunip naatsorsuutai ukiup naatsorsuuteqarfiusup kingornatigut ukiumi apriiip qaammataa naatinnagu aningaasaqarnermut ataatsimiititaliamit saqqummiunneqartassapput.

Imm. 2. Kommunalbestyrelsip naatsorsuutini suliaqarnera, takuuk aqutsinermut inatsimmi § 47, imm. 2, kingusinnerpaamik pissaaq naatsorsuutit aningaasaqarnermut ataatsimiititaliamit saqqummiunneqarnerisa kingornatigut kommunalbestyrelsip pisarnertut ataatsimiinnerani siullermi.

Imm. 3. Kommunip naatsorsuutaanut ilaassapput ukiup naatsorsuuteqarfiusup kingornatigut februaarip qaammataata naanissaa tikillugu ukioq naatsorsuuteqarfiusoq pillugu atukkat isertitallu tamarmik.

Imm. 4. Ukiuni arlalinni sanaartugassanut tunngatillugu naatsorsuutitut oqaaseqaatini missingersuutitut atukkat nassuarneqassapput, taamatutaaq utertillugit akilikkaniq tiguineqarsimasinnaasut sanaartukkap inaarsarneqarnissaanut piffissalersuinermit tunngatillugu. Kommunip sanaartukkamut ataatsimut aningaasartuutissaanut killiliussanut tunngatillugu atussamaakkanik ilimagisat imatut annertussusilerneqassapput oqaaseqaatit missingersuutitut tunngatillugu iluarsineqartariaqartunut tunngavigineqarsinnaanngorlugit.

Imm. 5. Aningaasat atorneqanngitsut naatsorsuutini aningaasartuutitut allanneqarsinnaanngillat, aningaasat ukiumi naatsorsuuteqarfiusussami aningaasaliissutigineqaaqqikkaluarpataluunniit.

Imm. 6. Naatsorsuutitut oqaaseqaatitut ilaassapputaaq kommunip killiffimmik kontuini nikerarnerit immikkut pingaaruteqartut.

§ 8. Naatsorsuutit kommunalbestyrelsip oqaaseqaataanik ilallit, takuuk aqutsinermut inatsimmi § 47, imm. 2, kommunalbestyrelsip suliarinninnera kingusinnerpaamik qaammammik ataatsimik kingoqqullugu Naalakkersuisunut nassiunneqassapput.

Kukkunersuineq

§ 9. Kukkunersuuisut ukiumoortumik naatsorsuutit kukkunersiorneqarnerat pillugu ukiumoortumik nalunaarusiamik tunniussaqaartassapput. Kukkunersuuisut taamatutaaq ukiup ingerlanerani ilaannakortumik nalunaarusiamik tunniussaqaartassapput tamanna piumasarineqarsimappat kukkunersuuisulluunniit tamanna pisariaqartissimassappassuk.

Imm. 2. Ilaannakuusumik nalunaarusiami kukkunersuuisimaneq nassuarneqassaaq, taamatutaaq pissutsit kukkunersuuisut saqqummiutissallugit pissutissaqaartissimasaat. Kukkunersuuisut oqaaseqaateqassapput isumaqarunik naatsorsuutini pineqartut kommunalbestyrelsip aalajangiineritut naapertuutinnngitsut imaluunniit iliuuseqartoqarsimasoq malittarisassanut atuuttunut akerliusumik.

§ 10. Kommunilbestyrelsip kukkunersuuisut nalunaarusiaata kalaallisuuata kommunimit tiguineqareerneratigut kukkunersuuisut nalunaarusiaat suliarissavaa.

Imm. 2. Kukkunersuuisut nalunaarusiaannik kommunalbestyrelsip suliarinninnera kingusinnerpaamik ullunik 14-inik kingoqqullugu kommunalbestyrelsip kukkunersuuisut oqaaseqaataannut akissuteqarnera Naalakkersuisunut nassiunneqassaaq.

§ 11. Kommunalbestyrelsip kukkunersiuisut nalunaarusiaannik akissuteqarnermini makku sianiginiassavai:

- 1) Kukkunersiuisut sulianik ingerlatsinerup suliallu ingerlaartarfiisa allangortinneqarnissaannik pitsanngoriaateqarnissaannilluunniit kaammattuuteqarsimappata, kommunalbestyrelsip oqaatigissavaa qanoq iliorluni piffissallu qanoq ilinerani allangortitsisoqassanersoq pitsanngorsaasoqarluniluunniit,
- 2) kukkunersiuisut kommunip suliamik ingerlatsinerani kukkunernik aalajangersimasunik tikkuagaqarsimappata kommunalbestyrelsip ilisimatitsissutigissavaa qaqugu kukkuneq iluarsineqassanersoq oqaatigissallugulu kukkusimaneq suliat ingerlaartarfiini imaluunniit suliassani allani allangortitsinissamut pisariaqartitsinersoq siunissami kukkusoqartannginniassammat,
- 3) kommunalbestyrelsip kukkunersiuisut oqaaseqaataat akuerisinnaanngippagu tamatumunnga pissutaasoq akissuteqarnermi taaneqassaaq.

Karseqarnek naatsorsuuseriveqarnerlu

§ 12. Kommunip karseqarneranik naatsorsuuseriveqarneranillu aaqqissuussinermut suliallu ingerlaartarfiinut malittarisassat erseqqinnerusut aqutsinermut inatsimmi § 50, imm. 1 naapertorlugu kommunalbestyrelsimit aalajangersarneqassapput.

Imm. 2. Malittarisassat imm. 1-imi taakkartorneqartut imarisaat kukkunersiuisut kommunalbestyrelsillu isumaqatigiinngissutigissappatigit Naalakkersuisut aalajangiissapput.

Atuutilerfia

§ 13. Nalunaarut manna atuutilerpoq 1. april 2012-mi. Peqatigitillugu atorunnaarsinneqarpoq kommunit missingersuusiortarnerat, naatsorsuutaat, kukkunersiuisarneq aamma karseqarnerat naatsorsuuseriveqarnerallu pillugit Namminersorlutik Oqartussat nalunaarutaat nr. 13, 26. juli 2010-meersoq.

Namminersorlutik Oqartussat, ulloq 3. februar 2012.

Anthon Frederiksen

/

Hans-Erik Bresson